

CONVENIO DE COLABORACIÓN ENTRE O SERVIZO GALEGO DE SAÚDE E A ASOCIACIÓN ESPAÑOLA CONTRA O CANCRO (XUNTA PROVINCIAL DE A CORUÑA), PARA O DESENVOLVEMENTO DE PROGRAMAS DE VOLUNTARIADO NA ÁREA SANITARIA DE FERROL

MEMORIA XUSTIFICATIVA

O xerente do Servizo Galego de Saúde **DECLARA:**

Que o Servizo Galego de Saúde e a Xunta Provincial de A Coruña da Asociación Española contra o cancro (AECC) formalizaron o 30.04.2025 o convenio arriba referido. A duración do convenio será de catro anos a contar dende a súa data de formalización.

Que o instrumento convencional ten por obxecto a colaboración das partes no ámbito dos centros sanitarios pertencentes a Área Sanitaria de Ferrol (en adiante ASF), co fin de promover un maior benestar e unha maior calidade de vida para os enfermos de cancro e as súas familias que de xeito libre e voluntario queiran ser beneficiarios das intervencións planificadas.

As principais actividades a desenvolver son:

- Creación dunha rede de apoio estable, duradeira e de confianza de acompañamento ao paciente oncolóxico, necesario en momentos de incerteza e con énfase no paciente en coidados paliativos.
- Apoiar no intercambio e asimilación da información que reciben os pacientes e familiares que son diagnosticados por primeira vez de cancro.
- Prestación de apoio na realización de xestións administrativas e alivio dos coidadores, para facilitarlles o seu descanso físico e emocional.
- Axuda a transmisión de información útil e necesaria para concienciar sobre o impacto que xera a enfermidade e tamén, sobre os servizos gratuítos que ofrece a Asociación.
- Actividades de animación e entretemento para facilitar a estancia da persoa enferma no hospital e a distracción con actividade de lecer.
- Dinamización da comunicación cos pacientes e a participación da sociedade a través de espazos nos que se transmite e comparte información.
- Fomentar a recuperación dos pacientes oncolóxicos afectados por problemas de saúde que interfieren a nivel persoal, familiar ou social.
- Apoio e colaboración en actividades dirixidas a promover hábitos de vida saudables, particularmente do nivel de actividade física na poboación xeral e deshabitación tabáquica.

En calquera caso, as actividades desenvolvidas polo persoal da AECC non son constitutivas de prestacións sanitarias propias da carteira de servizos do Servizo Galego de Saúde.

Que o convenio fundaméntase no seguinte:

Segundo o artigo 92 da Lei 8/08, de 10 de xullo, de Saúde de Galicia o Servizo Galego de Saúde, creado pola Lei 1/1989, é un organismo autónomo de natureza administrativa, dotado de personalidade xurídica de seu e plena capacidade para o cumprimento dos seus fins.

O Servizo Galego de Saúde está adscrito á Consellería de Sanidade, que exercerá sobre el as facultades de dirección, vixilancia e tutela. O obxectivo do Servizo Galego de Saúde é a prestación dos servizos de atención sanitaria individual de cobertura pública no ámbito da Comunidade Autónoma de Galicia. Enumerándose no artigo 94, as súas funcións.

Pola súa banda, a Asociación Española Contra o Cancro (AECC) é unha institución con personalidade xurídica propia e plena capacidade de obrar para o cumprimento dos seus fins, de carácter benéfico asistencial e sen fin de lucro. Fundada en 1953 e declarada de "*utilidade pública*" en 1970, ten como principal fin loitar contra o cancro en todas as posibles modalidades coñecidas, ou que no futuro se coñezan, mediante o desenvolvemento de funcións e actividades de divulgación, de prevención, de investigación, de información de carácter sanitario ou asistencial.

Ambas institucións teñen obxectivos comúns e complementarios e polo tanto, a colaboración entre ámbalas dúas permite aproveitar ao máximo os seus potenciais. Dita colaboración ten interese positivo tanto para as dúas institucións como para a veciñanza da Área Sanitaria de Ferrol.

A formalización do presente Convenio non requiriu de dotacións orzamentarias específicas por parte de ningunha das partes asinantes.

Esta colaboración queda excluída da aplicación da lexislación de contratos administrativos, a tenor do disposto no artigo 6.2 da lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estimouse xustificado o recurso á sinatura do instrumento convencional, con exclusión doutras figuras.

E para que conste, asíñase esta memoria, en Santiago,

